



FASIN IL BUGUL CUN STRAULIN

Cheste setemane "Ciribiribin" al à il plasê di presentâus un ospit speciâl: al è il cjantautôr cjargnel Lino Straulino, che sore a jessi un brâf musicist al è ancje un grant cognossidôr dai struments musicai plui antics de nestre tiere. Straulino al à passion par costruîju di bessôl, cun materiâi facii di cjatâ: cumò lis cocis a son propit di stagjon! In esclusive par "Ciribiribin" Lino al à pensât une vilote che nus spiege cemût costruî un "bugul", un strument a percussion che al somee al "berimbau" brasilian.

Mandi mandi mularie
Sêso pronts a fâ un strument
Se mi dais un tic di rete
Us al spieghi dal moment



"Bugul" duçj lu clamavin
Che il so non al è chel li
Za il Pirona tal so libri
lu à palesât cussi

E par fâlu nus covente
Tirà dongje un biel baston
Une coce vueide e secje
E une cuarde di liron



Prin si fasin dôs busutis
Tal baston di ca e di là
E par denti po si passe
La cuardute di tirâ



Al è impurtant però impensâsi
Che la cuarde e à di passâ
Just tal mieç da la coçute
Prin di scomençâ a ingropâ

Une volte che la cuarde
E je fissade su chel len
Al bastarà spostâ la coce
Fin a tindile par ben

A chest pont nus mancje dome
Di bui fûr inmò un bachet
E tirant un fil di pescje
Meti dongje un biel archet

A la fin di cheste vore
Cul gno bugul voi cjantant
Ben poiât ator de spale
Jo lu suni cjaminant.



Rispuint come Proust



Non

Gaia

Etât

10

Dulà sêstu a stâ

a Bordan

Ce ti plasial de tô citât/dal to paîs

la fontane di Prussia, la mont
di S. Simion e il riu

Ce no ti plasial de tô citât/dal to paîs

nuie

Miôr ami o amie

Rebecca

Il to difiet

o soi cjastrone

Il difiet dai tiei gjenitôrs

cuant che a àn ce fâ
no mi scoltin

La ultime volte che tu âs vaiût

chel altri mês

Lis vacancis plui divertentis

a Cherso

Il colôr che ti plâs di plui

celest

Il nemâl che ti plâs di plui

cjaval

Ce robe ti avilissie

cuant che cuachid un nomi
scolte

Ce no ti plasial fâ

i compits

Ce ti fasial pôre

i madrocs

Ce volaessistu fâ di grande/grant

la veterinarie

Il libri o film che ti à plasût di plui

Arthur e i minimej

I nons che ti plasìn di plui

Lussie, Jacopo

Robe di bevi preferide

aghe e frambue

Robe di mangjâ che ti plâs di plui

la salate

Personaç preferit/preferide

Rapunzel

Il to pipinot

Tata Mia: e je une pipine

LA FILASTROCJE

UN DOI TRÊ



Un doi trê
cuatri cinc sîs siet
un doi trê
cuatri cinc sîs siet
un doi trê,
un doi trê
bambinute
ven cun me.

CE ISAL?



A son cuatri sûrs che si corin simpri daûr
e no si cjapin mai.
La rispueste tal prossim numar.

UNE RIDUÇADE...



Cuâl isal il colm par un pes?
Pierdisi intune tace di aghe.

AHHH! LA RISPUESTE DAL NUMAR STÂT

Il miluç ingranât



PIRON È SEDON



Frico Di Patatis: e in taule a son duçj contents

Ce che al covente par mangjâ in 4:

- 1 kg di patatis
- 500 gr di formadi di latarie di 3 mês
- 1 cevole
- Sâl



In Friûl no je fieste cence polente e frico. E alore pe polente cjate cualchidun plen di fuarce par cueile e messedâle sul spolert e tu prepare il frico!

Prime di dut taie la cevole fine fine. E se ti ven di vai nuie pôre, e je dome colpe sô: prove a metile sot de aghe e viôt se ti passe.

Scjalde une fersorie cuntun pôc di vueli e met dentri la cevole par fâle murî. Zonte un pocje di aghe se e covente.

Intant che e cuei prepare lis patatis. Spelilîs e tailîs a tocuts piçui.



Zontilîs te padiele, salilîs e cuvierç cuntun tapon, cussi si cuein tal lôr vapôr. Messede, se e covente zonte un pocje di aghe, e spiete... come par dutis lis robis buinis ancje pal frico bisugne vê pazienze 😊

Taie il formadi a stricutis o a tocuts e cuant che lis patatis a saran molis, metilu dentri e messede ben. Une volte si dopravin propit lis strissulis, ma vuê no si cjatin cuasi plui e alore si dopre il latarie.



Cumò il frico al à di fâ chê bieles crostute che nus plâs tant, cussi al è plui facil ancje di zirâ. Juditi cu la coviertorie e, se no tu sês sigûr, domande jutori a un grant: sâstu ce dam se il frico ti cole fûr de padiele!



Cuant che al varâ fat la crostute di dutis dôs lis bandis al sarâ pront par jessi metût tal plat e mangjât daurman!

